

## Լ. Դ. ՄԻՆԱՍՅԱՆ

(Նոր Զուղա-Իրան)

### ՀԱՅՆՐԵՆ ԱՌԱՋԻՆ ՏՊԱԳԻՐ ԳՐՔԵՐԻ ՄԱՍԻՆ

Ինչպես հայտնի է, հայերեն առաջին տպագիր գրքերը հրատարակվել են Վենետիկում Հակոբ Մեղապարտի կողմից XVI դարի սկիզբներում: Հակոբը հրատարակել է հինգ գիրք և մի մաս մի գրքույկից ու միացրել հրատարակված իր գրքերից մեկին: Այդ հինգ կամ վեց գրքերն են՝ 1. «Պարզատումար», 2. «Պատարագատետր», 3. «Ուրբաթագիրք», 4. «Աղթարք», 5. «Տաղարան» և 6. «Վասն գանի»:

Հնատիպ այս հինգ-վեց գրքերից մինչև այժմ հայտնաբերված են սակավաթիվ՝ 5—6 օրինակ միայն, որոնցից առաջին տպագրվածը ցարգ համարվել է «Պարզատումար»-ը, որի մեջ եղած տոմարական աղյուսակի առաջին տարեգրքի թվականը կրում է ԶԿԱ (1512) թիվը, որն և ընդունվել է որպես դրքի տպագրության տարեթիվ:

«Պարզատումար»-ն հաջորդող երկրորդ տպագրված գիրքը համարվել է «Պատարագատետր»-ը, որի վերջին էջի վերջում ունեցած հիշատակարանում հիշված է 1513 (ԶԿԲ) թիվը:

Ստորև այդ հիշատակարանը նույնությամբ և ամբողջությամբ.

«Գրէցաւ ս[ուր]ր տառս ի. ջ. կր. ի ա[ստա]ծնապահ քաղաքս ի Վէնէժ որ է Վենետիկ ֆոանկստեան, ձեռամբ մէղապարտ Յակոբին, ով որ կարդայք մեղաց թողութի[ւն] խն[դ]րեցէք ա[ստուծո]յ»:

Հակոբի հրատարակած մյուս գրքերը թվական չունեն, ուստի և համարվել են ավելի ուշ ժամանակի հրատարակվածներ:

Հայաստանի Մեսրոպ Մաշտոցի անվան մատենադարանի կողմից 1964 թ. հրատարակված «Բանբեր Մատենադարան»-ի թիվ 7 դրքի մէջ (էջ 275—295), Պ. Ռաֆայել Իշխանյանը մի ուսումնասիրական զեղեցիկ հոդված ունի, ուր մանրակրկիտ ձևով, Հակոբի գրքերում գործածված վերնագրային շրջնագրողների մաշվածության վրայով քննության է առել այն խնդիրը, թե Հակոբի տպագրած անթվակիր գրքերից որ մեկն է ամենից առաջ տպագրվել և որ թվականին:

Հոդվածագիրը իր ուսումնասիրության մեջ միջանկյալ հարցում է արել Երուսաղեմի միաբանության հայրերին, որ իրենց ունեցած «Պատարագատետր»-ի վրա պարզեն եղած ենթադրությունը:

Երուսաղեմի արած հարցումը թողնելով իրենց պատասխանելու, ստորև հայտնենք, որ Նոր Զուղայի Ս. Ամենափրկչյան Վանքի թանգարան-մատենադարանում ևս գտնվում է Հակոբի տպագրած գրքերից երկուսը՝ «Պատարագատետր»-ը և «Ուրբաթագիրք»-ը, որոնց մասին դժբախտաբար հիշված չեն ո՛չ Գ. Լևոնյանի «Հայ գիրքը և տպագրության արվեստը» գրքում և ո՛չ էլ մեզ ծանոթ մյուս մատենագիտական ցուցակներում:

Վերոհիշյալ գրքերի վրա, ըստ Պ. Ռաֆայել Իշխանյանի հարցումի, որոշ ուսումնասիրություն կատարելով, ներկայացնում ենք դրանց արդյունքը և մեր համեստ կարծիքը:

Նոր Զուղայի թանգարան-մատենադարանի երկու գրքերը՝ «Պատարագատետր»-ն ու «Ուրբաթագիրք»-ը կազմված են միասին, անունների հիշած հերթականությամբ: Առաջինն ունի 43 քերթ, 86 էջ, միջից պակասում է մեկ քերթ, լրիվը 44 քերթ է, երկրորդն ունի 24 քերթ, 48 էջ: Իսկ դրա վերջին մասը՝ «Սուրբ Կարիանոս»-ը 27 քերթ, 54 էջ: Վերջին մասից պակասում է «Վասն գանի» հավելված գրքույկը, մամուլներում ունի գ. գ. և գր. համարներ և վերնագրերի հետևյալ բաժանումները՝ «Սուրբ Կարիանոս», «Ուստիանէ կուսին», «Մաղթանք առսուրբսն», «Աղօթք Փոկասու» և «Այս է գիր օձահարիս»:

Այս երկու գրքերը թեև բաժանված են կազմից և ունեն սկզբում ու վերջում բաժանված քերթեր, բայց այնպես ամուր են կապված միմյանց, որ անգամ հնարավոր չեղավ ստուգել, թե միացյալ քերթեր ունեն, թե ոչ:

Գալով գործածված զարդարներին ու շրջանակազարդերին, ասենք, որ զարդ միայն «Պատարագատետր»-ն ունի և դա էլ ոչ թե տպագրված էջերի վերևում, այլ ք էջի նկարի վերևին ու ներքևին, որոնց ձևը տարբեր է միանգամայն մյուս գրքերի զարդերից:

«Պատարագատետր»-ում գործ են ածվել միայն «Բանբեր»-ի հոգվածում հիշված թիվ 9—16, «Պարզատումար»-ի շրջանակազարդերը Ա. Կ. և Ե. պրակներում և «Ուրբաթագրքի» մեջ եղած թիվ 1—8 շրջանակազարդերը Բ. Գ. և Զ. պրակներում:

«Կարիանոս»-ի մեջ, բացի երկու տեղ կրկնվող նկարներից, որ ցույց է տալիս հիվանդի վրա աղոթք կարդալու պահը, կան երկու այլ նկարներ ևս, որոնցից առաջինի նախորդ էջի վրա գրված է. «Յոհանն», ըստ երևույթին, Յովհաննե ավետարանիչը, իսկ Ի էջում՝ մի մարդու նկար գիրքը ձեռքին: Մյուս նկարը ներկայացնում է մի մարդու պատկեր՝ օձը բռնած ձեռքին և գտնվում է «Աւձահարթ»-ի բաժնի սկզբում, առանց որևէ անվան հիշատակության:

Այժմ երկու խոսք Հակոբի տպագրած գրքերի հերթականության մասին:

Թեև մեզ համար դժվար է որևէ կարծիք հայտնել, որովհետև մյուս գրքերը շունենք մեր ձեռքի տակ, որի համար և անհրաժեշտ է շատ լուրջ ու բազմակողմանի քննություն, ինչպես որ փորձել է շրջանակազարդերի մաշվածության վրայով ցույց տալ հարգելի բանասեր պ. Ռաֆայել Իշխանյանը. Բայց մի բան, որ կուզեինք ասել, դա այն ենթադրությունն է, որ «Պարզատումար»-ը կարող է տպագրված լինել ավելի վաղ, քան մինչ հիմա հիշվել է, այսինքն՝ 1511 թ. և ոչ թե իր մեջ հիշված ԶԿԱ 1512 թ.: Սովորաբար տպագրված տոնացույցների տարեգրերի աղյուսակի առաջին թիվը դրվում է գրքի տպագրության հաջորդ տարվանից, ինչպես 1868 թ. Երուսաղեմում տպագրված տոնացույցը և այլ նման տոնացույցներ ու տարեգրերի աղյուսակներ ունեցող ժամագրքեր: Նույնը կարելի է ասել Կոստանդնուպոլսում Աստվածատուրի կողմից տպագրված անթվակիր տոնացույցի մասին, ուր տարեգրերի աղյուսակում հիշված է 1704 թ. և վստահաբար գրքը տպագրվել է 1703 թ.:

Այսու վերաբերյալ հիման վրա պետք է հղրակայնել, որ «Պարզատումար»-ը տպագրվել է մեկ տարի ավելի շուտ, քան իր մեջ հիշված 1512 թ., իսկ «Պատարագատետր»-ը տպագրվել է 1513 թ., ինչպես որ ասում է իր հիշատակարանը:

Նոր Զուղա

8 մարտ 1966